



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunal Distritál Suai
10 Jullu 2015

Krime violénsia bazeia ba jéneru kontinua aas iha Tribunál Distritál Suai

Iha Maiu no Juñu 2015, JSMP observa katak Tribunál Distritál Suai kontinua julga kazu krime violénsia bazeia ba jéneru hamutuk 20 hosi kazu 41 ne'ebé mak tribunál julga.

Hosi kazu 20 ne'e involve kazu ofensa ba integridade fízika simples ho natureza violénsia doméstika hamutuk 13, abuzu seksuál ba menór 2, abuzu seksuál ba menór ho natureza incestu 1, koasaun seksuál 1, violasaun seksuál 1, la halo tuir obrigasaun alimentár 1 no podér paternal 1. Kazu hirak ne'e tribunál konklui ona kazu hamutuk 18 no kazu 2 seluk sei iha prosesu nia laran.

JSMP observa katak maioria kazu sira involve ofensa ba integridade fízika simples ho natureza violénsia doméstika, tribunál kontinua aplika pena suspensaun no pena multa sein dever adisional no la kondena arguidu sira selu indemnizasaun sivíl atu rekopera fila fali vítima sira nia sofrémentu.

“Ami apresia tribunál nia komitmentu atu kontinua fo prioridade hodi julga kazu sira ho natureza violénsia bazeia ba jenéru. Maibé JSMP hanoin importante atu konsidera opsaun ne'ebe rigorozu no apropriadu atu prevene krime ne'e kontinua buras iha sosiedade no alternativa atu rekopera fila fali vítima sira nia sofrémentu tanba kauza no prejuizu hosi arguidu ninia hahalok,” dehan Luis de Oliveira Sampaio, Diretór Ezekutivu JSMP.

Tuir JSMP, aleinde kondena arguidu sira ho pena prizaun, presiza mós kondena sira atu selu indemnizasaun ba vítima sira nu'udar rekoñesimentu ida ba sofrémentu ne'ebé vítima sira infrenta, embora sira nu'udar feen ho laen. Mekanismu ne'e atu eduka ita nia sosiedade atu kumpriende katak se komete krime sei hetan responsabilidade oioin aleinde responsabilidade kriminál. Vítima sira dalabarak presiza tempu naruk hodi rekopera fila fali sira nia sofrémentu ne'ebé sira hetan hosi arguidu ninia hahalok no nia implikasaun mak sira tenki lakon sira nia rendimentu hodi sustenta sira nia moris.

Tanba ne'e, JSMP rekomenda ba ministériu públiku no tribunál atu inklui indemnizasaun sivíl iha desizaun tribunál.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaune-mail: luis@jsmp.minihub.org

info@jsmp.minihub.org

Telefone:3323883 | 77295795